



Emmanuel-Bernard Kasanda  
Evêque de Mbujimayi (R.D.C)

**"BUPOLE, KE DYETU DIBANZA"**  
**MWAKU WA TAATU MUKUBI WA NTENJI WA MBUJIMAYI**  
**DYA MATUKU 6 / 12 /2023**

Baana beetu bananga,

Dinanga ne bupole bya kudi Mvidi Mukulu Taatu nè Mfumu wetu Yezu Kristo biikala neenu bwonso !

1. **Ndi nganji kunusakidila bonso bwenu bwa dimweneka dyenu mu nzubu ewu wa disambila wa Bonzola udi mwinyika Yowanese Mwoweshi ne udi mwasa pa kakuna katumbuka aka ka Bonzola.** Nudi bakukile bu ntunda ne ngenene, bandamuna kulubila lundi munwela amu bubalala nzubu umwe ne kipacila kasunguluke : **se mbwa kubila Taatu wa kashidi, Mvidi Mukulu wa bankambwa ne Taatwende wa Mfumu wetu Yezu Kristo, bwa atusombesha mu bupole mu Ditunga dyetu mu cikondo eci cya mushinga mu Iwendu Iwetu lwa panu ; cikondo cya masungula.** Nwenu cisa cya Maweja, ne diitaba dyonso nyewu nudyela ku makasa a Mukalenga ne Mfumu wetu ne ditekemena dyonsu. Ndi nsanka bwa diitaba dyenu dinudi baleja pa kufika apa, kabidi nzangika cipidi cya bwena ntanda bwenu bwa shishishi.

Mikanda Minsanto idi ijadika ne : « **pikala bantu banyi badi batumbisha Diina dyanyi badipwekeshe, bobo bantendelele, bankebe, badilengeje, meme nembateleje mu dyulu mundi, nembalekele mibi yabo, nengakajulule ditunga dyabo** » ( 2 Kulondolola 7,14).

2. Baana ba Taatu Mvidi Mukulu, cikondo citudi ncy a mushinga mukole, cikondo cyakana ne cilenga bwa difululuka ne dilubuluka dya Ditunga dyetu. Masungulangana a matuku abidi aa mbujitu bwetu bonso. Bwalu, bu mwambila Augustin Munsanto ne : **"Mvidi Mukulu wakatufuka katuyiku, kena mwa**

**kutupandisha katuyiku to”.** Bwanyi meme, masungulangana atudi bindile adi ajula ditemena dya Kongo mushidimuka, mulengeja ne mubikila bwa kuya kumpala bilenga. Tumvwayi, baana beetu, se : masungulangana ki ncipanza cya munda mutupu to ! Mmushindu utudi nawu bwa koobokeela dilengela dya **Ditunga pa kusungula balombodi badi mwa kufikisha bwatu ku dilobo dya dishidimuka bwa matuku male mu bupole, mu ditalala, mu buwetu ne dimvwangana.** Ndi nnulomba nwenu baana beetu, bwa twikala balombola kudi lungenyi alu lwa dilengeja ne dilongolola bidiku. Bambulwisha kudi Malengele a Mwena kuulu, tujukilayi kuulu, tumvwayi ne Kongo wetu ewu ke cyetu cyuma cya mushinga citudi nacyo, cidi citrusanga, cya kunanga, kucyunga bilenga ne cya kulamuna ku miinu ya mikanku idi isunsula ne ibutula byuma byetu, mesu ayo matangija amu ku mpaya yayo, diakalenga dyetu kadiyiku ne mwaba munda mwabwe..., ditupwekesha mushinga ke didi mu mitu yabo. Tulamunayi Kongo wetu ku mbanga ya banguluba wa cinyangu badi banwa mashi etu twetu beena Kongo pa kuvwambula mabanji etu, kukeba ndululu munkaci mwetu idi itufikisha ku dyela mashi a baana beetu pansi.

3. Diiba dyakanyi, tutabalayi bwa kusunguluja lupele ne mponda, kusunguluja banangi balelela ba **Ditunga** ku ba nkumbinkumbi cidiila mu mwishi, kusunguluja basangishi balelela ba bantu ne basaki ba bakwabo ku dikanangana bwa kupeta bidibo bajinga, kusunguluja bakebi ba bupole ku aba bakebi ba cimvundu, beena mucyawudi, lukinu nè ba mututungulu cilama mabeji, beena bwiminyi nè bivi.
4. Baana beetu, Mvidi Mukulu neasambe Ditunga dyetu bu twetu mwa kwendela mu njila wa bupole ne buwetu bwa kukumbaja mifundueyi : « ba dyakalenga mbakebi ba bupole, bwalu ne bababikile ne baana ba Mvidi Mukulu » (Mt 5,9). **Tulekelayi diteleja ngakwilu wa bakosolodi ba bantu, wa bwena ne bukwa ; macyo etu ikale ku meeyi a bupole ne bobumwe.** Kongo **mbuloba bwetu bonso.** Mwena kongo onso, nansha yeye Mukongu, Muswahili, Muluba, mwaba onso udiye usangidibwa mu Kongo emu, **mbuloba bwanda.** Tweepelayi ngakwilu udi ujula lukinu ne disombwelangana. Tudikonganyi, tudiswikayi bu mukaba ne cilamba, twenza cintu cimwa bwa tufika ku ditwila nkanana batufinyi batangila cinyanu

**Tusungidilayi bobumwe bwetu, tulamayi ditunga dyetu ke cyetu cyuma cya mushinga, tukube byonso bitudi badibakile mu dikenga pakwepela cikisu ne cinyangu.**

5. Baana beetu, tudi balume ne bakaji beena diitaba ne beena ditekemena. Malengela aa adi abengangana ne dipwekesha maboko, nanku tulamayi ditaba mu cikondo cyonsu. Mwaku wa Mvidi Mvidi wa dituku edi udi utumanyisha disanka ne dikosa mwadi, dituku adyo ne twamba ne : "Yeye ke Mvidi Mukulu utuvwa batekemena, tusankayi, tusangalayi bwa mutumpadisha. (Yeshaya 25,9). **Bwa aba bonso badi bacyoka, ne dinanga dyonso tudi tubamanyisha diitaba**

**ne ditekemena dyetu mu mudimu mukwata kudi Emmanuel, Mwena meeji,  
Mvidi Mukulu wa bucole,Taatu wa kashidi, Mulumbulwishi wa bukwa  
bisamba, Mfumu wa bupole (Yeshaya 2,4 ; 9,6 )**

6. Bananga ba Taatu Mvidi Mukulu, Jean Paul II Munsantu udi wamba ne : « bupole ke dyetu dibanza ; bupole budi butulomba bukitu ne budisangi. Kabwena kulwisha, bwalu ndipa dya Mulopo, budi butulomba disambila ».

Ke bwalu kayi tusamble ne François wa mu Assise :

Mfumu, ungenze cyamu cya bupole, R/

Mwaba udi lukinu, mbweje dinanga, R/

Mwaba udi dibundangana, mbwejaluse, R/

Mwaba udi ditapuluka, mbweje bobumwe, R/

Mwaba udi ntupakanyi, mbweja bulelela, R/

Mwaba udi mpata, mbweje diitaba, R/

Mwaba udi dipampakana, mbweje ditekemena, R/

Mwaba udi midima, mbweje butoke, R/

Mwaba udi dibungama, mbweje disanka, R/

Mfumu,

Cikebi bwa bansamba, apo meme nsambangana, R/

cikebi bwa bangumvwe, apo meme ngumvwe, R/

cijingi bwa bannange, kadi meme nnange, R/

Bwalu mpawudi ufila, ke pawudi upeta, R/

Mpwudi upwa muoyo, ke pawudi usangana, R/

Mpwudi ufwilangana lusa, ke padibo kakufwila peeba luse, R/

Mpwudi ufwa, ke pawudi ubiika ku mwoyo wa kashidi, R/

Amen !

**\* Taatu Emmanuel-Bernard KASANDA**

**Mukubu wa Ntenji wa Mbujimayi**